



Broj: 09-11-4-3328-2/25
Sarajevo, 29. 6. 2025. godine

Na osnovu člana 21. stav 1. i člana 22. stav 2. Zakona o reviziji institucija u Federaciji Bosne i Hercegovine („Službene novine Federacije BiH“, br. 22/06), generalni revizor d o n o s i

ZAKLJUČAK

o obustavi finansijske revizije „Naftnih terminala Federacije“ d.o.o. Ploče za 2025. godinu

Obustavlja se finansijska revizija Naftnih terminala Federacije d.o.o. Ploče za 2025. godinu, zbog nemogućnosti dobivanja revizorskih dokaza za izvršenje finansijske revizije, u skladu sa Zakonom o reviziji institucija u Federaciji BiH („Sl. novine FBiH“, broj 22/06) i ISSAI 705 - Modifikacije mišljenja u izvještaju nezavisnog revizora.

Obrazloženje

Shodno Planu revizija za 2025/2026. godinu broj: 01-11-3078-14/25, Ured za reviziju institucija u Federaciji Bosne i Hercegovine (u daljem tekstu Ured za reviziju) je aktom broj: 09-11-4-3328/25 od 3. 11. 2025. godine najavio prethodnu finansijsku reviziju „Naftnih terminala Federacije“ d.o.o. Ploče (u daljem tekstu NTF) i konačnu reviziju aktom broj: 09-11-4-3328-1/25 od 5. 5. 2026. godine. Uz Dopise za najave revizije dostavljeni su i Pregledi potrebne dokumentacije za izvršenje prethodne i konačne revizije sa rokovima dostave podataka do početka obavljanja revizije.

Zbog nemogućnosti pribavljanja dozvola za rad u Republici Hrvatskoj radi obavljanja revizije NTF-a, Ured za reviziju je sa članovima Uprave „Operator – Terminali Federacije“ d.o.o. Sarajevo (OTF), koji u svojstvu Skupštine vrše ovlaštenja prema društvu NTF, dogovorio da se finansijska revizija obavi u prostorijama OTF-a gdje će se i dostaviti tražena dokumentacija.

Prethodna revizija najavljena je za period 15. do 24. 12. 2025. godine. Međutim, s obzirom na to da dokumentacija relevantna za obavljanje revizije nije bila pripremljena, niti stavljena na raspolaganje revizorskom timu, uprkos prethodno usaglašenim terminima i zahtjevima za dostavu dokumentacije prethodna revizija obavljena je u periodu od 16. do 18. 12. 2025. godine. Zbog nemogućnosti provođenja planiranih revizorskih procedura, usljed nedostavljanja dokumentacije, revizorski tim je nakon tri dana obustavio rad na terenu u okviru prethodne revizije.

Radi obavljanja konačne revizije, održan je sastanak 15. 5. 2026. godine u prostorijama OTF-a, na kojem su prisustvovali uprave OTF-a, NTF-a i Ureda za reviziju. Na sastanku je dogovoreno da će se sva potrebna dokumentacija dostavljati kako bi se revizija provela efikasno i bez zastoja, kao i da će se nedostajuća dokumentacija tražena u predreviziji dostaviti do 15. 5. 2026. godine. Međutim, tražena dokumentacija nije dostavljena u dogovorenom roku. Dokumentacija nije dostavljena ni do 1. 6. 2026. godine, koji je u Pismu najave konačne revizije bio određen kao krajnji rok za dostavu, niti do planiranog početka rada revizorskog tima na terenu u prostorijama OTF-a 8. 6. 2026. godine.

Konačna revizija nije započela 8. 6. 2026. godine, kako je prethodno najavljeno, te je revizorski tim održao sastanak sa članovima Uprave OTF-a 9. 6. 2026. godine, na kojem je predsjednik Uprave NTF-a telefonski obećao da će sva zahtijevana dokumentacija biti dostavljena do 11. 6. 2026. godine do 16. sati. Do navedenog datuma nije dostavljena sva tražena dokumentacija, već samo manji dio nekompletirane dokumentacije. Tim za reviziju je 15. 6. 2026. godine otišao u prostorije OTF-a kako bi nastavio započetu reviziju, međutim i dalje tražena dokumentacija nije bila dostavljena. Također, kontakt osoba iz NTF-a, za koju je navedeno da će biti na raspolaganju, odbila je kontaktirati sa timom uz obrazloženje da za to nema ovlaštenja od Uprave NTF-a.

S obzirom na to da revizorski tim nije bio u mogućnosti prikupiti ni osnovnu dokumentaciju neophodnu za obavljanje revizije, utvrđeno je da su ispunjeni uslovi za povlačenje iz revizije. Revizorski tim je, nakon sagledavanja svih činjenica dao prijedlog generalnom revizoru da se obustavi finansijska revizija NTF-a.

Prijedlog je sačinjen uvažavajući odredbe članova 39. i 40. Zakona o reviziji institucija u FBiH u dijelu V. Ovlaštenje za prikupljanje informacija i tačkama 13 b) 1., A8. i A15. Međunarodnog revizijskog standarda 705 – Modifikacije mišljenja u izvještaju nezavisnog revizora (MrevS), prema kojem u slučaju da revizor ne može dobiti dovoljne i primjerene revizorske dokaze, nastupilo je ograničenje obima revizije koje je uzrokovala revidirana institucija, te će se revizor povući iz revizije, jer nisu stvoreni uslovi za provođenje revizije u skladu sa zakonskim propisima i profesionalnim standardima.

Nadalje, u skladu sa članom A15. MrevS 705, „kada revizor zaključi da je povlačenje iz revizije nužno zbog ograničenja djelokruga, može postojati profesionalni, zakonski ili regulatorni zahtjev da revizor saopšti regulatorima ili vlasnicima poslovnog subjekta pitanja u vezi sa povlačenjem.“ O obustavi revizije NTF-a bit će obaviještene i nadležne institucije.

Na osnovu naprijed navedenog i činjenice da Ured za reviziju nije dobio traženu dokumentaciju i nakon isteka svih datih rokova i perioda od šest mjeseci od najave prethodne revizije, generalni revizor je donio Zaključak o obustavi finansijske revizije Naftnih terminala Federacije d.o.o. Ploče za 2025. godinu.

Dostavljeno:

- Naftni terminali Federacije d.o.o. Ploče
- Operator – Terminali Federacije d.o.o. Sarajevo (u svojstvu Skupštine Naftnih terminala Federacije d.o.o. Ploče)
- Parlamentu Federacije Bosne i Hercegovine
- Parlamentarnoj komisiji odgovornoj za reviziju
- Vladi Federacije BiH
- Federalnom ministarstvu energije, rudarstva i industrije
- Kabinetu generalnog revizora
- Rukovoditeljici Sektora za finansijsku reviziju preduzeća u većinskom državnom vlasništvu
- Rukovoditeljici Sektora za razvoj, metodologiju i upravljanje kvalitetom
- Odjeljenju za pravne i opće poslove i ljudske resurse
- Revizorskom timu
- a/a

